

SDIRRUPARU LU MURU DI BERLINU

A lu nord 'n-ventu novu
vuncia banneri culurati di libirtà!
Biniritti li manu
ca sdirruparu ssu muru
ch'era la vriogna di l'umanità!
Mi sentu 'n-omu novu,
caminu a testa àuta
taliannu nta l'occhi
li pirsuni ca ncontru.
Mi sentu chiù leggiu e chiù licchettu,
pirchè sacciu ca cu tutti li macerii
di ssu muru
putemu fabbricari 'n-munnu novu!

CANTU D'ACEDDU

Ju lu ntisi na sira di jinnaru
vinìa di 'n menzu l'arvuli d'olivi,
era lu cantu di 'n-aceddu raru
cantava pi li morti e pi li vivi.

Cantava, e lu so cantu amaru
sciugghìa lu cori comu fussi nivi;
biati tutti chiddi c'ascutaru,
biatu puru ju ca lu sintivi!

Cantava priannu lu Signuri:
- Veni ccà 'n terra, ascùta a mia,
ccà c'è bisognu di lu to duluri.

Veni ccà 'n terra, ascùta la me vuci,
l'omini si scurdarunu di Tia,
veni a mòriri nàtra vota 'n cruci!

DISIÙ DI MAZARA

Cu' campa luntanu di lu so paisi
sulu chissi ponnu capiri stu duluri,
li suffirenci di stu mazarisi
ca mentri chianci parturisci amuri.

Sunnu quattordic'anni e quarchi misi
ca propriu comu vosi lu Signuri
campu sutta ddu celu trapanisi
sunnannu sti vaddati e sti chianuri.

Di sta me terra sentu lu disìu
e pi nun fari sempì 'u ruculusu
spissu volutamenti mi stravìu.

Ma quannu tornu ccà tantu amurusu
ju jettu lu me cori pi camiu
nta l'acqua di stu Màzzaru fitusu!

AMMÀTULA

Ammàtula jiti 'n giru
tutti li santi jorna
vistuti cu ssa mascara
di fausi galantomini.
A cu vuliti ngannari?
Lu specchiu di la vita
rifletti li vostri magagni
e si siti vistuti
iddu vi spogghia
e vi rifletti nudi.
Na vota, dissi lu Signuri:
- L'arvulu si ricanusci
di li frutti ca duna -
Livativi ssa mascara 'mrugghiuna,
omini di bassi sentimenti!
Cu tutti ssi tangenti
purtastivu l'Italia
a la ruvina.
Nudda pietà vi spetta,
vui miritati sulu na catina
e mancu 'n-cani ca vi duna retta!

TUTTU LU ME MUNNU

Staiu taliannu
sti me' figghiceddi
c"u cori chinu
d'amurusu affettu
e mi ni preju
di li so' risati.
Jocanu beddi cueti
e sunnu nchiffarati
cu li so' bambuliddi
stritti 'n pettu.
Ssi picciriddi sunnu
lu me celu
e me mughieri è lu sulì
chi quadìa stu cori
e lu jìnchi d'amuri
jornu pi jornu.
Iddi sunnu li me' stiddi,
li megghiu ciuriddi
di la vita mia.
Li taliu suspirannu
e mannu a lu Signuri
un pinseri d'amuri:
Dunacci saluti e paci,
iddi pi mia sunnu
tuttu lu me munnu!

MÒRINU CU MIA LI ME' SPIRANZI

Vigghianu li me' spiranzi
dintru stu cori nchiusi
e aspettanu piatusi
suspيرانnu...
Ntantu li jorna passanu...
Passanu li misi e l'anni,
vinniru li cinquant'anni
amari chiù di tannu.
Ammàtula aspettu e speru,
lu tempu havi li pedi leggi
e lu cori duru.
Tira drittu pi lu so caminu
e nun si ferma pi nuddu!
Cu na vuci rutta di chiantu
addumannavi na cannila
a lu Signuri
pi nun mòriri ô scuru,
e Iddu, ginirusu,
mi mannau lu suli.
Vistutu cu ssa luci
chi accurza l'agunìa
ora ju pozzu mòriri...
Però nun moru sulu,
ci sunnu ddi spiranzi
chi mòrinu cu mia!

RITURNANNU 'N CAMPAGNA

Sulu quarchi zuccu
vecchiu e nsarvaggiutu,
un ficu siccu,
un mennulu, un ranatu
e un gigantescu
ceusu stuccatu...
Chissu ristau
di dd'arvuli ciuruti!
Si tornu cu la menti
a lu passatu,
quannu li vitti
di pampini vistuti
viridi, beddi, chini di saluti,
daveru mi sentu ammaraggiatu!
Tannu c'era me patri
ca ci dava ciatu,
struria la gramigna,
erva di dannu,
e cu li so' manu amurusi
runcava, putava, nnistava,
zappava e siminava...
Tannu ssa terra
ch'ora mi pari dormiri rifarda,
daveru mi parìa un paradisu!

MALASIMENZA

Chiantu la paci e puru lu pirdunu
li chiantu sempì cu lu cori 'n manu,
però cu gran duluri mi n'addunu
chi n'arricogghiu odiu disumanu.
Ammàtula ci pensu e ci ragiunu
nun lu capisciu stu misteru arcanu,
ammàtula mi struru e m'apprumunu
nun lu capisciu no, stu munnu stranu!

Chiantu ducizza, affettu, simpatia;
amuri, fidi, rispettu, virità
e chiantu fratillanza 'n ogni via,
pinseri di giustizia e libirtà.
Ma a tempu di ricòta... caristia:
Gramigna, spini, vilenu, falsità;
tantu egoismu, tanta ipocrisia
e mancu 'n-sulu ciuri di buntà!

Allura sta simenza chi siminu
jornu pi jornu tutti li mumentu
a tutti banni luntanu e vicinu,
nun crisci nta lu cori di la genti?
Pacenzia versì me' 'un è distinu,
vosi scippari chiova cu li denti
lu bon tempu si vidi a lu matinu:
M'haju sgargiatu ammàtula pi nenti!